

適園叢書

張宗祥



清江雜錄

卷一

一

二

三



後村先生題跋卷之六

宋劉克莊

墨林方氏帖

梅都官

時蔡公以密學守泉故帖有南方景清物美之羨聖俞不以書名而結字妍華在歐蔡之間所餉蔡公鼠鬚筆并散卓云此葛老加意者葛亦宣城人蔡公嘗倩製筆故聖俞有此餉

賈內翰

賈公名字俱慕汲生其立朝大節似之初呂獻可嘗論公過失及公爲中丞呂除御史辭避不拜公奏誨向論臣一時公言其人方正願與同列史稱汲生戇褊公蓋賢於汲矣此帖與延平守云郡乃閩中孔道冀少加彌縫以弭嘵嘵所謂介

而能通者耶

沈內翰  
叡達

此與蔡忠惠帖也忠惠在計省最久有勞於國治平初副樞  
闕宰相擬忠惠及王珪以進厚陵不用而自擢王疇文通所  
云仰聽登用之命三年矣可見人望屬於忠惠如此忠惠之  
不大用猶以飛語中傷之故文通方承眷寵垂大用矣年僅  
四十而天王疇輩才望不及二公遠甚而名位過之此所謂  
命耶叡達詞翰突過其兄而官不遂亦命也

宋龍學

裕陵御製韓魏公神道碑命次道書次道乞如太宗皇帝書  
趙中書令碑故事上曰太宗宸翰子孫安敢倣效又曰卿父

子皆善事次道始奉詔上又求宣獻字次道遂進數軸然世  
但稱宣獻父子史學而罕稱其字裕陵天縱多能聖鑒尤高  
非輕許可者墨林所藏次道帖乃行草恨未見其楷隸耳次  
道名敏求宣獻名綬字公垂

蘇文忠公

鮒與祁大夫皆欲脫叔向於難然叔向拒鮒不答卒賴祁大  
夫以免者古之君子非但不肯因小人以求福亦不肯因小  
人以避禍也陳太丘弔張讓母喪荀緄爲文若娶唐衡女雖  
非求福未免畏禍此在叔向下矣欽永附王氏劉柳黨叔文  
既非避禍專欲求福此遠在荀陳下矣坡公書此有深意世  
言章子厚本與坡公善爲蔡卞所劫故坡亦南遷豈非子厚

密導此意坡公拒而不受乎余讀而深悲之

書左傳帖

西域文字與中華絕異然流傳既久雖華人未免爲其語自唐人虞褚帖中多用和南字歐陽字之學謂不曉和南爲何語不肯寫此二字學者衛道不得不然至坡公則手書佛經非一種心經在貝葉中尤古奧簡捷蓋在惠州時爲沈夫人所作夫人乃南圭使君之內嘗夢僧迦送子瞻過海者

書多

心經帖

仙者葛洪孫思邈皆有方書傳世抱朴子方最多世未有試之者若千金方則試而驗者多矣坡公於其中錄出此方豈以其言高虛似抱朴子歟恨吾老矣不能以身試方當俟識者

書千金方帖

蘇子美贈祕演詩云賣藥得錢止沽酒一飲數斗猶惺惺演  
塗去之子美大怒演云公詩傳萬古吾持戒不謹已爲浮屠  
罪人公又從而慕之乎懷素工草書同時如顏尙書張處士  
餉酒與魚前輩如坡公手錄其醉筆人固不可以無藝也此  
二髡一畏人知其飲酒一自狀其醉絕甚可笑

書懷素自作

五言帖

公自紹聖以後詩文未嘗有貶謫之歎己卯元符二年也公  
在昌化南遷七年矣所書子美天寒翠袖薄日莫倚修竹之  
句可謂哀而不怨婉而成章矣

書杜詩帖

公自跋云書夢得數詩今僅存二首前幅似爲人截去巫峽  
蒼蒼煙雨時時誤爲枝

書劉夢得竹枝歌帖

後村先生集卷之二  
余評此詩在張籍王建之下望盧仝劉叉向隔幾水坡公取其自在前輩論文氣象開闊如此

書晚唐詩帖

退之效盧孟歐公效蘇梅坡公效黃秦輒逼真而反勝之譬如老禪與學人問答機鋒常有餘郭功甫效太白潘放老效老杜用盡氣力而不近傍譬如襄人學富家調度事力苦不足也

效少游五言帖

唐樂府惟張籍王建本朝惟一張文潛耳坡公手錄此篇亦如退之於籍輩乎然文潛每篇語意有緩弱處不如籍建句句緊切

書張文潛寒衣歌

前詩紹聖南遷初至惠州所作也後詩建中靖國北歸過嶺所作也相去七年集中各有題後詩凡有二篇本不相聯屬

今合而爲一皆題云到惠州字亦可疑

書到惠州詩

公貴盛時士競趨其門攻文者託公以重其文挾藝者託公以售其藝及其遷謫也未聞一士如韓生之從殷浩至東陽李商隱從鄭亞來循州者蓋有相遇都城以扇障面不揖叔黨者矣潘衡何人乃渡海忍飢爲公留一年其人賢於李公麟輩遠矣墨百日不堅燥非善墨也然發墨至今猶託衡名矣嗚呼墨工能託其身傳其藝如此士豈可

下缺

萊州題名朝散郎何甫元符三年爲守帖云朝散使君卽其人也容齋三筆云英州江水貫市架木爲橋郡守建安何智甫始疊石爲之橋成坡公自海外歸爲作何公橋詩然則何名甫而字智甫帖云智翁者豈避其名耶南山之遊寧並轡

而不先升車以一代元老過荒遠小郡執謙特甚若不敢與  
太守鈞敵者前輩厚德如此海島非人所居韋執誼李文饒  
盧多遜皆往而不返此老羈囚累載白首北還乃云何時得  
卻掃一室復如在海外時其浩然不屈之氣非黨禍所能怖  
煙瘴所能死也

與何智翁四帖

方子容字南圭金紫公名峻之第四子擢皇祐甲科坡公貶  
惠州南圭爲守相處甚懽方氏書畫多經坡公題品或爲書  
佛經或爲書史傳往還簡帖尤多其家舊有萬卷樓所收坡  
公遺墨至四百餘紙後羽化略盡墨林僅有寫心經及左傳  
三數手簡十四幅而已前二帖云日與吏民望前塵又云治  
行有日併增忻忭可見坡公先至惠南圭後臨郡也其三云

厄苦塗窮眾所鄙棄公獨收恤其四寫碑其五答林媼酒其  
六借真誥可見太守之厚於黨人也其七其八其九皆言蔣  
薄葬事按列子極西儀渠之國親死則取柴焚之然後爲孝  
子蓋荒唐之寓言以誚尤而效之者謂後世中國眞以火葬  
爲俗蔣薄賴公一言免於荼毗之苦前輩雖困厄中而濟人  
利物之念終不少忘如此其十則再謫海外離惠時也其十  
一其十二其十三其十四則至番禺道間及至海外時云廢  
逐之餘傾蓋賴上權如平生世言坡素善南圭以此帖考之  
坡南行南圭出守始遇諸塗耳又云薰濡之喜旣深煩恩之  
媿益厚又云慰藉津逮求之古人亦未易得又云家累託治  
下無回顧憂思之心又云邁時去請見兩新婦許拜老嫂又

云白首投荒佩公閉門杜口謝絕萬事之戒又託致家書至  
昌化縣黨禍人所共畏賢者避之小人或販以爲奇貨潭帥  
溫益迫道鄉夜絕大江宜守囚山谷於譙樓遂死樓上台守  
脅了翁廣漕怖元城雷守罪以屋僦子由之人南圭當是獨  
能調護遷客待之如骨肉寧傲章蔡之凶燄不畏瘵疫之傳  
染有東鄰節義之風自惠州歸未七十卽挂其冠蓋勇退之  
志素定矣晚年夫婦壽考見其孫略登科第顯仕抑天報歟  
今直下雖微坡帖雖散其族人往往有珍藏者墨林亦族也  
又坡公手點漢書見在南圭族孫長谿宰之泰處

與方南圭

一四帖

二君不知何人可權失其姓時澤雖著姓氏而失其名當考

與可權長官時澤推官帖

醇之與二蘇交情如此惜不得其姓名方勸坡戒言語時詩禍未有萌也自密守徐自徐守湖自湖乃逮赴御史獄坡聰明了不自知子由亦未之知而醇之獨先知可謂見遠察微之士矣墨林所藏坡帖皆晚年字此帖在烏臺詩案以前尤清媚可愛

坡隸四帖

李舍人

此熙寧三舍人之一也可寶可寶名大臨字才元蜀人

右跋名臣十八家下

唐內翰 諫院

唐氏人物最盛彥猷居錢塘質肅居荆南然皆通譜林夫翰

墨不減彥猷二問風節無忝質肅蔡公有與彥猷帖云前月十九當直後殿見殿中君作爲動搖山岳雷霆之下挺然不動遂有春州之行見人子弟爲善而賀其尊老至情也又絕口不自言嘗救質肅一節盛德也林夫俊人始贊新法後攻介甫雖非粹德要合於易之不遠復賢於迷而不復者多矣

錢內翰

忠懿眞行草字猶有唐人典型至穆父則本朝人字矣

張浮休

此帖在落待制謫守武昌之時詞意猶不自保知黨禍之未已也未幾再謫副團商州安置

劉元城

當公南遷監司希宰相意欲殺之以媒進信臣者以一宰之微乃因陳秀才遣曹亮以書候公起居可謂賢矣按信臣姓鄧名弼亮舂陵人元祐中登第嘗爲新興令與元城道鄉善家藏二公遺墨甚多

### 陳了翁

了翁旣爲二蔡所怨交游畏禍至斷往還此帖謝其人餉子魚荔枝必莆士也又云在宜春得書不敢修答豈非恐累其人耶吾里前一輩惟陳當時諫議與了翁先後居言路意其與諫議公者

### 陳殿院

殿院與了翁齊名世謂二陳字亦清麗可愛

鄒道鄉

道鄉直聲蓋穹壤然惟諫書凜如霜日一字不可增損至如他文亦多泛應此帖求銘輒得又以巽詞答之亦可見公之盛德也

鄭介夫

介夫福清人居於縣之西塘先廬猶存余屢至焉手澤書數冊及坡公贈詩一卷其家寶藏至五世孫循不能守多歸於墨林此帖數冊中之一葉耳

黃魯直

以眉山方韓柳可也少游似未至此田地豈以禹錫秦氏子

有所假借耶

與秦禹錫帖

右山谷自書其得意唐律也如桃李春風一杯酒江湖夜雨十年鐙黃流不解浣明月碧樹爲我生涼秋固佳句如初平羣羊對叔度千頃潭千吞一石對庖丁解十牛則似欠工學者止學得此等句而前二聯未有似之者本朝草書惟蘇才翁杜祁公若山谷艸法錢穆公固嘗評之矣

書律詩帖

朱給事名紱字君貺元祐黨人清修君子也山谷書謫仙此詩與之殊不可曉

書太白詩

### 秦少游

馬詩有李杜之作在前後人極力馳驟不能及少游此詩非不工但神氣漫散呼喚不來然與晁張俱客蘇門而結字自爲一體則異乎二三子之尙左者